



CONVENIO DE COLABORACIÓN ENTRE A CONSELLERÍA DE POLÍTICA SOCIAL E A ENTIDADE CRUZ VERMELLA DE GALICIA PARA A EXECUCIÓN DO PROGRAMA DE SOPORTE PSICOSOCIAL A PERSOAS MAIORES QUE EXERCEN LABORES PARENTAIS CON MENORES DE IDADE A TRAVÉS DUNHA ESCOLA DE AVÓS E AVOAS EDUCADORES/AS (PROGRAMA AVÓS/AS COIDADORES/AS)

Santiago de Compostela, 23 de setembro de 2016

REUNIDOS

Dunha parte,

D. José Manuel Rey Varela, conselleiro de Política Social, nomeado en virtude do Decreto 126 /2015, do 4 de outubro, e actuando en uso das facultades que lle atribúe o artigo 34 da Lei 1/1983, do 22 de febreiro, de normas reguladoras da Xunta e da súa presidencia.

Doutra parte,

D. María del Carmen Colmeiro Rojo, con DNI 35.882208T, que actúa en representación da Cruz Vermella de Galicia, en virtude da súa condición de presidenta, segundo consta na súa acta de nomeamento de data 17 de abril de 2015.

As dúas partes interveñen no nome e representación das súas respectivas institucións no exercicio das competencias que lles están legalmente atribuídas, recoñecendo mutua e reciprocamente capacidade para obrigarse mediante o presente convenio nos termos que nel se conteñen e, para o efecto,

EXPOÑEN

PRIMEIRO. Que as administracións públicas poden celebrar convenios de colaboración con outras entidades públicas así como con persoas xurídicas suxeitas ao dereito privado ao abeiro do disposto no artigo 4 do Real decreto legislativo 3/2011, do 14 de






novembro, polo que se aproba o texto refundido da Lei de contratos do sector público e mais no Acordo do Consello da Xunta do 27 de marzo de 1991, sobre convenios de cooperación con outros entes públicos e de colaboración con particulares, feito público por Resolución da Consellería de Economía e Facenda do 8 de abril de 1991.

SEGUNDO. Que a Comunidade Autónoma Galega, de conformidade co disposto no artigo 27.23 do Estatuto de Autonomía de Galicia, ten competencia exclusiva en materia de asistencia social e, en virtude da mencionada competencia, foron aprobadas a Lei 13/2008, do 3 de decembro, de servizos sociais de Galicia e a Lei 3/2011, do 30 de xuño, de apoio á familia e á convivencia de Galicia.

TERCEIRO. Que a Consellería de Política Social, ao abeiro do disposto no Decreto 176/2015, do 3 de decembro, polo que se establece a súa estrutura orgánica, é o órgano da Administración autonómica ao que lle corresponde o exercicio das competencias e funcións en materia de acción social de apoio á familia, entre outras. Neste eido correspóndelle a planificación e coordinación das entidades prestadoras de servizos sociais no sector socio-familiar así como a cooperación con elas e, en particular, coas entidades de iniciativa social.

CUARTO. Que Cruz Vermella de Galicia é unha entidade de iniciativa social, sen ánimo de lucro, inscrita no Rexistro Único de Entidades prestadoras de Servizos Sociais da Consellería de Política Social co nº E-23, que orienta o seu labor, entre outros, ao ámbito da familia e da infancia, sector comprendido no ámbito competencial desta Consellería de Política Social.

QUINTO. Que esta entidade con longa experiencia no traballo social con diferentes colectivos, salienta que a realidade social actual pon de manifesto que moitas persoas maiores se fan cargo da educación e crianza de netos e netas menores de idade, como fonte esencial de apoio á conciliación familiar e laboral así como fonte principal de






apoio social cando os pais e as nais non poden facerse cargo dos seus respectivos fillos e fillas.

Pero estas funcións de apoio, asumidas polas persoas maiores, poden en moitos casos supoñer un factor de estrés que afectan a súa calidade de vida, debido tanto ao lapso xeracional como ás condicións asociadas á idade, e pola súa vez ponse de manifesto, a través do enfoque sistémico en terapia familiar, que os problemas familiares son en moitos casos transxeracionais, xa que determinadas pautas educativas que puideron xerar disfuncións en determinados grupos familiares, poden predispoñer dalgún xeito a que se repitan nas novas xeracións a través das dinámicas que se establecen no coidado dos netos e das netas, constituíndo tamén este un factor de risco para os nenos e as nenas.

SEXTO. Que con base nestas premisas, a entidade deseñou un Programa de apoio psicosocial a persoas maiores que exercen labores parentais de coidado e crianza de netos e netas, que na actualidade se desenvolve con financiamento público nos concellos galegos de Carballo e Narón, a través das subvencións de asignación tributaria do 0,7% do IRPF.

SÉPTIMO. Que considerando o interese social do proxecto tanto para o benestar das familias como para a prevención no ámbito de menores daqueles grupos familiares afectados, a Consellería de Política Social a través da Dirección Xeral de Familia, Infancia e Dinamización Demográfica, ten previsto establecer un convenio de colaboración coa entidade Cruz Vermella de Galicia para facilitar o desenvolvemento do proxecto nas sete grandes cidades de Galicia. O carácter singular deste proxecto, sen convocatoria pública, xustifícase na experiencia amosada por esta entidade, que leva desenvolvendo este programa en varios concellos galegos dende o ano 2006.

De acordo co artigo 2.1.c) da Lei 9/2007, do 13 de xuño, de subvencións de Galicia, o proxecto ten por obxecto o fomento dunha actividade de interese social. Ademais, o





artigo 19.4.c) da mesma lei establece que, con carácter excepcional, subvencionaranse aquelas actuacións que acrediten razóns de interese social e humanitario.

Así mesmo, o artigo 31.2 en relación co artigo 55 da Lei 13/2008, do 3 de decembro, de servizos sociais de Galicia, habilita, por razóns de interese público e debidamente xustificadas, a subscrición de convenios singulares con entidades de iniciativa social debidamente autorizadas para a prestación de servizos sociais cando por razóns humanitarias ou de emerxencia social, ou ben cando pola singularidade das características da entidade, a especificidade dos servizos que presta ou a especial vulnerabilidade das persoas usuarias, non sexa posible ou conveniente promover a concorrência pública, como é o caso.

Por todo o anteriormente exposto, a Consellería de Política Social considera conveniente a sinatura deste convenio de colaboración con base ás seguintes

CLÁUSULAS


PRIMEIRA. OBXECTO DO CONVENIO



constitúe o obxecto deste convenio regular o marco da colaboración entre a Consellería de Política Social e a entidade Cruz Vermella de Galicia para o desenvolvemento do Programa de apoio psicosocial a persoas maiores que exercen labores parentais de coidado e crianza dos seus netos e netas a través dunha escola de avós e avoas educadores/as e a súa implantación nas sete grandes cidades de Galicia.

SEGUNDA. ACTIVIDADES

Para o desenvolvemento do programa implantarase unha escola de avós e avoas educadores/as en cada unha das sete grandes cidades de Galicia (A Coruña, Lugo, Ourense, Pontevedra, Ferrol, Santiago de Compostela e Vigo), durante os meses de outubro, novembro e decembro do ano 2016.



As escolas de avós e avoas educadores/as tratan de ofrecer unha resposta a persoas maiores que exercen labores parentais de coidado e crianza, a través de espazos



grupais de formación e auto soporte, así como un traballo individual en función das necesidades concretas.

Nos obradoiros formativos desenvolveranse habilidades específicas que capaciten a estas persoas para o manexo de situacións cotiás na crianza e educación dos nenos e nenas ao seu cargo, orientándoos e apoiándoos en todos os aspectos que leva consigo a crianza. Ademais de prestarlle un apoio psicosocial para fortalecer as habilidades de autocoidado necesarias para afrontar esta situación dunha maneira segura e saudable. A escola de avós e avoas propicia tamén a constitución de grupos de axuda mutua integrados por voluntarios, avós e avoas, netos e netas para que unha vez finalizadas as actividades das sucesivas escolas, as persoas participantes poidan seguir mantendo unha vinculación e axudándose mutuamente.

TERCEIRA. GASTOS SUBVENCIONABLES, IMPORTE E CONDICIÓN DE PAGO

Consideraranse gastos subvencionables aqueles que, de xeito indubidable respondan á natureza da actividade subvencionada e se realicen no prazo establecido no convenio.

De acordo co artigo 29.2. da Lei 9/2007, do 13 de xuño, de subvencións de Galicia, considérase gasto realizado o que foi efectivamente pagado con anterioridade á finalización do período de xustificación establecido no presente convenio.

A Consellería de Política Social contribuirá ao financiamento dos gastos derivados da execución do presente convenio cunha contía global de cincuenta e catro mil vinte e nove con cinco euros (54.029,5 €) resultante de multiplicar a contía de 7.718,5 euros por trimestre e localidade na que se levará a cabo o programa, con cargo a aplicación orzamentaria 12.02.312B.481.0 dos orzamentos da Dirección Xeral de Familia, Infancia e Dinamización Demográfica da Consellería de Política Social na anualidade de 2016, que existe crédito axeitado e suficiente (Lei 12/2015, do 24 de decembro, de orzamentos xerais da Comunidade Autónoma de Galicia para o ano 2016). A devandita achega económica límitase á compensación de gastos e en ningún caso supón beneficio económico para a entidade conveniente.





De conformidade co disposto no artigo 40.1.f) do Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño, de subvencións de Galicia, establécese como data límite do prazo de xustificación das actuacións desenvolvidas no marco deste convenio o 12 de decembro de 2016.

O pagamento da contía referida neste convenio farase do seguinte xeito:


- Ata o 80% do total concedido poderase facer efectivo mediante pagos parciais á conta da liquidación definitiva na medida que a entidade xustifique os gastos e os pagos realizados.
- Antes de facer efectivo o 20% restante, a entidade deberá presentar unha declaración complementaria do conxunto de axudas solicitadas, tanto as concedidas como as pendentes de resolución, para este mesmo concepto, das distintas administracións públicas competentes ou calquera dos seus organismos, entes ou sociedades. Así mesmo, enviará certificación xustificativa de gastos acompañada das correspondentes facturas, nas que se reflicta que os gastos realizados foron iguais ou superiores á axuda concedida e xustificantes do pagamento nos termos recollidos no artigo 42 do Decreto 11/2009, do 8 de xaneiro.



Os gastos acreditaranse mediante facturas e demais documentos de valor probatorio equivalente con validez no tráfico xurídico mercantil ou con eficacia administrativa, nos termos establecidos regulamentariamente de acordo co artigo 28 da Lei 9/2007, do 13 de xuño, de subvencións de Galicia.

A este respecto, esta entidade queda exonerada de constituír as garantías a que fan referencia os artigos 62.3 e 67 do Decreto 11/2009, do 8 de xaneiro, por tratarse dunha institución sen fin de lucro, segundo menciona o artigo 65.4.f) deste mesmo decreto.

En todo caso, a Consellería de Política Social queda facultada para recabar en calquera momento a información que considere necesaria para o seguimento da efectividade do contido deste convenio, e para esixir cantos documentos estime necesarios para a debida xustificación do gasto.





Así mesmo, a entidade estará obrigada a facilitar toda a información que lle sexa requirida pola Intervención Xeral da Comunidade Autónoma, o Tribunal de Contas e o Consello de Contas, no exercicio das súas funcións de fiscalización e control do destino das axudas.

CUARTA. COMPATIBILIDADE CON OUTRAS AXUDAS

Estas axudas son compatibles con outras subvencións, axudas, ingresos ou recursos para a mesma finalidade, procedentes de calquera administración ou entes públicos ou privados, nacionais da Unión Europea ou de organismos internacionais.


A contía da subvención en ningún caso poderá ser de tal contía que, illadamente ou en concorrencia con outras subvencións, axudas, ingresos ou recursos, supere o custo da actividade subvencionada.

QUINTA. OBRIGAS

A entidade Cruz Vermella de Galicia deberá cumprir cos requisitos sinalados no artigo 10 da Lei 9/2007, do 13 de xuño, de subvencións de Galicia para poder ser beneficiarios das axudas, así como as obrigas establecidas no artigo 11 da mesma lei e que son, entre outras, as seguintes:

a) Para os efectos de acreditar que se atopa ao día das súas obrigas tributarias e fronte á Seguridade Social, e de que non ten pendentes de pagamento débedas coa Comunidade autónoma nin é debedor por resolución de procedencia do reintegro, no momento da sinatura do convenio deberá achegar unha declaración responsable que recolla os ditos extremos no que se manifesta baixo a súa responsabilidade este cumprimento e que se compromete a mantelo durante o período de vixencia de convenio.

Someterse ás actuacións de comprobación que deba efectuar a Consellería de Política Social, así como calquera outra comprobación e control financeiro que poidan





realizar os órganos de control competentes, tanto nacionais coma comunitarios, e achegar tanta información lle sexa requirida no exercicio das actuacións anteriores.

c) Comunicar á Consellería de Política Social, a obtención doutras subvencións, axudas, ingresos ou recursos que financien as actividades subvencionadas, así como a modificación das circunstancias que fundamentasen a concesión da subvención. Esta comunicación deberá efectuarse tan axiña como se coñeza e, en todo caso, con anterioridade á xustificación da aplicación dada aos fondos percibidos.

d) A entidade Cruz Vermella de Galicia deberá dar adecuada publicidade do carácter público do financiamento do investimento obxecto de subvencións nos termos regulamentariamente establecidos.

A entidade tamén estará obrigada a facilitar toda a información que lle sexa requirida pola Intervención Xeral da Comunidade Autónoma, o Tribunal de Contas e o Consello de Contas, no exercicio das súas funcións de fiscalización e control do destino das axudas.

Ademais, deberá cumprir coa obriga de subministración de información nos termos establecidos no artigo 4 da Lei 1/2016, do 18 de xaneiro, de transparencia e bo goberno.



SEXTA. PERSOAL E RELACIÓNS LABORAIS

A selección do persoal específico que Cruz Vermella de Galicia dedicará á execución do programa corresponderá á dita entidade. A sinatura deste convenio non comporta relación laboral, contractual ou de calquera outro tipo, entre os profesionais que van desenvolver as actividades e a Consellería de Política Social, de xeito que non se lle poderá esixir a esta ningunha responsabilidade, nin directa, nin indirecta, nin subsidiaria, polos actos ou feitos ocorridos durante a execución das actuacións e/ou a vixencia deste convenio.



SÉTIMA. PUBLICIDADE DO CONVENIO

Este convenio será obxecto de publicación, de acordo co previsto na Lei 1/2016, do 18 de xaneiro, de transparencia e bo goberno. Así mesmo, incluírase no Rexistro Público



de Axudas, Subvencións e Convenios, de conformidade co Decreto 132/2006, do 27 de xullo, polo que se regulan os rexistros públicos creados nos artigos 44 e 45 da Lei 7/2005, do 29 de decembro, de orzamentos xerais da Comunidade Autónoma de Galicia para o ano 2006, e mais co artigo 16 da Lei 9/2007, do 13 de xuño, de subvencións de Galicia.

E de conformidade coa Lei 38/2003, do 17 de novembro, xeral de subvencións, o instrumento de colaboración e a información sobre a subvención serán comunicados á Base de Datos Nacional de Subvencións (BDNS).

OITAVA. PROTECCIÓN DE DATOS DE CARÁCTER PERSOAL

En aplicación deste convenio respectaranse cantas esixencias establece a Lei orgánica 15/1999, do 13 de decembro, de protección de datos de carácter persoal, adoptando cantas medidas resulten necesarias para cumprir as súas previsións e, en particular, para garantir a seguridade e integridade dos datos e a súa protección fronte alteracións, perdas, tratamentos ou accesos non autorizados.

Concretamente e en cumprimento do disposto no artigo 5 da citada Lei, infórmase de que os datos persoais que facilite con motivo da tramitación e concesión da subvención quedarán rexistrados nun ficheiro de titularidade da Xunta de Galicia, de acordo co disposto na Orde do 15 de decembro de 2011 pola que se regulan os datos de carácter persoal existentes nesta consellería, denominado Relacións administrativas coa cidadanía e entidades, cuxa finalidade é a xestión e rexistro deste procedemento. Poderanse exercer os dereitos de acceso, rectificación, cancelación e oposición ante a Secretaría Xeral Técnica da Consellería de Política Social, como responsable do ficheiro, solicitándoo mediante o envío dun correo electrónico a sxt.politicasocial@xunta.gal.

As partes asinantes do convenio manifestan o seu consentimento para que os datos persoais que constan neste convenio, así como o resto das especificacións contidas nel poidan ser publicados no Portal de transparencia e Goberno aberto.





NOVENA. COMISIÓN DE SEGUIMIENTO DO CONVENIO

Terase en conta, como mecanismo de seguimento da execución deste convenio o Acordo do Consello da Xunta do 27 de marzo de 1991, sobre convenios de cooperación con outros entes públicos e de colaboración con particulares, feito público por Resolución da Consellería de Economía e Facenda do 8 de abril de 1991.


Así mesmo créase un órgano mixto de vixilancia e control da execución e aplicación deste convenio e de resolución de controversias administrativas. A esta comisión mixta de seguimento serán sometidas todas as cuestións derivadas do desenvolvemento deste convenio e non recollidas nel, e, con carácter previo, aquelas que impliquen desconformidade por algunha das partes asinantes.

Esta comisión estará composta polos seguintes membros:

- O coordinador autonómico, ou un vogal da entidade en quen delegue.
- A directora Xeral de Familia, Infancia e Dinamización Demográfica, que poderá delegar na subdirectora xeral de Demografía e Conciliación, que exercerá a presidencia.
- Actuará como secretario/a, con voz pero sen voto, un/unha funcionario/a da Dirección Xeral de Familia, Infancia e Dinamización Demográfica.

DÉCIMA. VIXENCIA DO CONVENIO

Este convenio estará en vigor dende o día da súa sinatura ata o 31 de decembro de 2016. Non obstante, abranguerá as accións obxecto do convenio que se realicen pola entidade desde o 1 de outubro do ano 2016.





DÉCIMO PRIMEIRA. NATUREZA XURÍDICA

O presente convenio ten carácter administrativo rexéndose polas súas cláusulas e, no seu defecto, aplicaráselles os principios do Real decreto legislativo 3/2011, do 14 de novembro, polo que se aproba o texto refundido la lei de contratos do sector público, para resolver as lagoas e dúbidas que se puidesen presentar. Á súa vez, en canto lle sexa de aplicación, estarase ao disposto na Lei 9/2007, do 13 de xuño, de subvencións de Galicia e no Decreto 11/2009, do 8 de xaneiro, polo que se aprobou o seu regulamento, no Decreto legislativo 1/1999, do 7 de outubro, polo que se aproba o texto refundido da Lei de réxime financeiro e orzamentario de Galicia e demais normas de procedente aplicación.

DÉCIMO SEGUNDA. RESOLUCIÓN DO CONVENIO

Darán lugar á resolución do presente convenio as causas que a continuación se relacionan, procedendo de acordo co establecido no artigo 33 da Lei 9/2007, do 13 de xuño, de subvencións de Galicia sendo necesario o reintegro total ou parcial da axuda percibida e os intereses de demora reportados desde o momento do seu pagamento, ata a data na que se acorde a procedencia do reintegro:

- mutuo acordo das partes asinantes
- incumprimento das cláusulas do convenio por algunhas das partes asinantes
- resistencia, escusa, obstrución ou negativa ás actuacións de comprobación e control financeiro, así como incumprimento das obrigas contables

DÉCIMO TERCEIRA. CUESTIÓN LITIXIOSAS

Correspóndelle á Consellería de Política Social a resolución das cuestión litixiosas que poidan xurdir sobre a interpretación, modificación, resolución ou efectos deste convenio e os seus acordos poñen fin á vía administrativa.





Contra estes acordos poderase interpoñer potestativamente recurso de reposición no prazo dun mes ao abeiro dos artigos 116 e 117 da Lei 30/1992, do 26 de novembro, de réxime xurídico das administracións públicas e do procedemento administrativo común ou directamente recurso contencioso administrativo, no prazo de dous meses, ante a Sala do contencioso administrativo do Tribunal Superior de Xustiza de Galicia, de conformidade co disposto na Lei 29/1998, do 13 de xullo, reguladora da xurisdición contencioso administrativa.

E, en proba de conformidade de canto antecede e para a debida constancia, as partes asinan o presente convenio por triplicado exemplar, no lugar e data indicados no encabezamento.

O CONSELLEIRO DE POLÍTICA SOCIAL



Jose Manuel Rey Varela

A REPRESENTANTE LEGAL DE CRUZ
VERMELLA DE GALICIA



M^a del Carmen Colmeiro Rojo